



## 恁久好無

想愛問你，恁久好無？手機仔便便，就在吾手頭項，係摻你个號碼一揷，就做得打分你！總係，恁著電話打通過後，你係接著吾電話个時節，佢毋知愛仰般摻你開嘴、問安、打嘴鼓，該就會蹂蹂蹴蹴，毋知愛仰結煞正好？係講該央時，你乜毋知愛仰般講起事，恁著通等个電話，兩頭接等个線路項，空空無半點聲，怙怙無話好講个尷尬，定著滅到大家無結無煞！佢想去想轉，還係，無愛製造恁樣个麻煩較贏！手項个手機仔雖然恁便，就摻想愛問安、毋敢打電話个心情，園在自家个心肝肚就好咧！

想愛問你，恁久好無？舊年到今，僇就無再見著面！你乜知一年有幾長，換算起來，就係有三百六十五日、就係八千七百六十點鐘、就係五十二萬五千六百分鐘，每一分鐘个想念，一直在吾个心肝頭掛吊，一直無法度解下來。手機仔毋敢打電話，該來傳 LINE 分你，毋知好無？講實在，佢無想愛傳該便便个、人家做好个問安貼圖，因爭該無法度代表，佢對你深深个思念！係講自家來做問安貼圖分你，又試著無法度表達，佢對你个感情同思念。

係啊！這下个通訊軟體恁多、仰般利便。有傳統个電話好打、有手寫个書信好寄、還有 LINE、MSN、FB、IG、SKYPE 這兜好拿來打電話、傳訊息，仰會佢毋曉得用任何一種通信軟體，來表示佢對你个感情同思念？係毋係佢還頭暈腦脹、還言清醒，尋無頭緒好來寫信仔分你？起頭，就言有想好，當然就毋知仰般接下來？佢想去想轉，就係想毋著，愛仰般同你講起事。孤栖，想愛尋隻伴來問候个心情；孤栖，想愛尋又尋毋著伴來講心事个心情，麼人摻佢共樣，有恁孤栖个感受？

實在也無閒噢！大家！各人有各人个頭路愛做；各人有各人个家庭愛照顧；各人有各人个朋友愛交際；各人有各人个生活愛過……，哪有恁多米國時間，逐日來互相問安、寫信仔、聯絡感情？親朋好友，有心問安个圖、網路个影片、故事，有當多單淨係無閒時節个複製、貼上，實在當難表達互相特殊、在意个感情。就算這下有恁利便个通信軟體，噯無閒好來表示，自家對親朋好友个真心、情感！難怪有人講，現代个社會，大家無閒直掣，雖然交通資訊緊來緊利便，當像正經縮短咁大家个空間距離，毋過，人摻人之間个感情、心理距離，噯分人感覺著緊來緊薄，緊來緊遠咧！

真想愛問你，恁久好無？在這大家無閒个時節，在這人情緊來緊薄，緊來緊感受毋著燒暖个年代，毋知你過來好無？

作者：邱一帆

### ☆詞彙學習☆

【便便】pien pien：現成的。

【掛吊】gua diau：擔心。

【揷】kim：按。

【頭暈腦脹】teu<sup>ˇ</sup> hin<sup>ˇ</sup> no<sup>ˋ</sup> bien<sup>ˋ</sup>：頭昏腦脹。

【蹂蹂蹴蹴】no<sup>ˇ</sup> no<sup>ˇ</sup> qio qio：猶豫不決。

【無頭緒】mo<sup>ˇ</sup> teu<sup>ˇ</sup> tag<sup>ˋ</sup>：沒有頭緒。

【無結無煞】mo<sup>ˇ</sup> gad<sup>ˋ</sup> mo<sup>ˇ</sup> sad<sup>ˋ</sup>：不知該如何是好。

【孤栖】gu<sup>ˊ</sup> xi<sup>ˊ</sup>：孤單。

【頭路】teu<sup>ˇ</sup> lu：工作、事業。